

cara-cara yang melanggar agama di dalam pertubuhan itu. Kita berdoa Allah akan memberi hidayat kepada orang-orang kita supaya menegak dan mendirikan agama kita dengan sepenuh-penuh maknanya.

* * *

Mengalu-alukan Warta

Tiada dapat dinafikan bahawa banyak lagi ikhtiar-ikhtiar sayoga diadakan pada memperelokkan bahagian persuratan dan pewartawanan Melayu. Umat Melayu dalam Semenanjung Melayu kita yang dikasih ini sangat-sangat berhajatkan kepada suratkhabar Melayu pada menggalakkan kemajuan orang-orang Melayu dalam perkara-perkara iktisad, kebajikan, pergaulan dan kebudayaan istimewa pada menyemai perasaan yang mendatangkan kebajikan raya kepada umat dan negeri serta menjauhkan diri daripada faham yang merosakkan maka dengan tujuan inilah rakan kita Warta akan terbit dengan sifat suratkhabar mingguan Melayu sebagai permulaan pada tiap-tiap pagi Selasa mulai dari 4 Ogos ini dengan menugaskan kepada dirinya tujuan-tujuan yang tinggi itu dengan serba baharu dan boleh benar diharap yang Warta akan mengambil tempat sebagai pelopor dan pembuka jalan di dalam langkah-langkah dan cara-cara pembawaan yang akan dijalannya.

Warta akan menyertai ikhtiar-ikhtiar membaiki, memelihara dan mengembangkan bahasa dan persuratan Melayu tetapi Warta akan mengambil perdirian yang bebas dan merdeka daripada dasar sebarang dan segala badan siyasan.

Warta akan mengandungi pada tiap-tiap kali keluarannya segala warta berita dalam negeri dan luar negeri dalam seminggu yang dahulunya itu dengan rupa yang padat, kemas dan ringkas serta menarik hati. Ia akan mengandungi rencana-rencana yang berisi, bernas dan memberi asyik kepada pembaca-pembacanya dalam bab iktisad, kebudayaan sejarah, kebajikan raya dari qalam penulis-penulis yang ternama. Selain daripada itu

Warta akan memuat juga cerita-cerita kecil, penggali hati, kisah-kisah yang ganjil luar daripada kebiasaan adat dan aqal. Gambar-gambar kartun yang mengandungi sindiran dan pengajaran serta gambar-gambar pemandangan yang cantik akan diterakan juga.

Pencetak dan penerbit Warta ialah Matba'ah ini yang telah jadi sebuah syarikat *limited* dengan nama Qalam First Limited dari bulan ini. Penaja dan pengarah-pengaruhnya ialah Yang Mulia al-Sayyid 'Abdullâh bin Hamid al-Edrus ketua pengarangnya dan Yang Mulia al-Sayyid Hüsîn bin 'Ali al-Saggof penguasanya. Julung-julung bilangannya akan mengesahkan mutu dan dasar rakan kita maka tambalah ilmu pengetahuan tuan dengan membaca Warta pada tiap-tiap minggu dan di antara tuan-tuan ada yang akan menerima seribu ringgit hadiah yang mesti dimenangi.

Pengarang-pengarang, penulis-penulis dan ahli-ahli persuratan dan ilmu yang telah berkhidmat menjadikan majalah Qalam sebagaimana keadaannya yang ada sekarang semuanya akan mengambil bahagian juga menulis di dalam Warta. Juga wartawan-wartawan yang terkenal di dalam suratkhabar harian Warta Malaya yang berjasa dahulu bersama-sama memberi khidmat-khidmat mereka untuk menjadikan Warta ini sebuah akhbar mingguan yang berfaedah dan mustahak adanya di sisi persuratan kita.

Bagi keluarannya yang pertama banyak makalah-makalah yang membina akan disiarkan di antaranya makalah-makalah panduan hidup bagi penanam-penanam padi, mengembalikan orang-orang tahanan kepada masyarakat, pertanyaan-pertanyaan berkenaan dengan undang-undang, sejarah perkembangan Islam, hal-ehwal kegentingan siyasah di Indonesia, lawatan ke Indonesia – wal hasil banyak perkara-perkara yang mustahak menjadi tatapan dan bacaan yang berfaedah kepada umat dan bangsa.

Sesungguhnya Allah Ta'âlâ itu Pemurah, ia suka kepada kemurahan, dan Ia suka kepada perangai-perangai yang tinggi, ia benci kepada perangai-perangai yang rendah (maksud hadis riwayat Abû Dâwûd)